

Asuntu Polítika, Demokrasi no Seguransa

Korrupsaun, impunidade, oho ema ho forsa polítiku, limitasaun ba liberdade espresaun no liberdade imprensa, interferénsia iha sistema judisiál mak dalan sira ne'ebé hafraku instituisaun demokrátiku sira iha nasaun ida ne'ebé hamriik bazeia ba prinsipiu demokrasi hanesan Timor-Leste adopta. Dezde tinan 2012 Timor-Leste prosesa ona kazu korrupsaun oin-oin ne'ebé envolve figura públiku balun. Maske nune'e iha balun mak rejenta atu tuir prosesu justisa sira iha Timor-Leste.

Timor-Leste mós esperiénsia operasaun konjunta boot ida ne'ebé halakon ema balun nia moris inklui oho figura públiku Timoroan ida, Mauk Moruk.

Haree fila fali ba asuntu pasadu nian, relatóriu CAVR "Chega!", KPP-HAM Indonézia, Komisaun Peritu ONU nia rekomenda atu kria Tribunál Internasionál hodi julga autór prinsipal ba krime kontra umidade iha Timor-Leste husi tinan 1975-1999.

Maibé, autór krime grave sira ne'e nafatin livre iha Indonézia no kaer poder importante balun, no sira seidauk ba hatán iha tribunál. Durante tempu okupasaun Timor-Leste mós lakon ema barak obrigatóriamente. To'oroas ne'e Governu Timor-Leste seidauk asina no ratifika Konvensaun Internasionál ba Ema Lakon Obrigatóriu.

Ezemplu hirak ne'e hatudu katak Timor-Leste iha instituisaun estadu direitu demokrátiku sira ne'ebé sei fraku hela no ida ne'e fó impaktu mós ba seguransa no aplikasaun lei ne'ebé justu iha Timor-Leste. Lei, política ka programa saida mak ita-boot nia partidu polítiku ka koligasaun sei kria ka promove iha tinan lima oin mai atu:

1. Redús problema korrupsaun iha tinan lima oin mai?

2. Kria sistema justisa ne'ebé forte no haforsa sistema judisiál iha Timor-Leste?

3. Oinsá lori ema sira ne'ebé responsavel ba krime grave sira iha tempu okupasaun Indonézia nian ba tribunal internasionál?

4. Haforsa liberdade espresaun no liberdade imprensa inklui servisu sosiedade sivíl sira iha Timor-Leste iha tinan lima oin mai?

5. Haforsa instituisaun seguransa estadu sira hanesan F-FDTL no PNTL atu respeita direitus umanus no promove profesionalizmu iha instituisaun seguransa rua ne'e nia laran?

6. Lori estadu Timor-Leste ba asina Konvensaun Internasionál kona ba Ema Lakon Obrigatóriu iha tinan lima oin mai?



BROXURA ELEISAUN ANTISIPADA 2018-2023

La'o Hamutuk: Institutu ba Analiza no Monitor Dezenvolvimentu iha Timor-Leste

Dili, 10 Abril 2018

HANOIN MOLOK BA VOTA

SAIDA MAK PARTIDU POLÍTIKU NO KOLIGASAUN SIRA NIA PLANU KONA-BA:



- Oinsá sustenta finansas estadu bainhira rendementu husi petróleu la iha ona?
- Oinsá investe liu tan ba setór agrikultura, turizmu no indústria naun petrolíferu sira?
- Oinsá hadiak asesu ba sistema edukasaun, saúde, saneamentu no bee moos ba ema hotu?...

HARE'E PERGUNTA PRINSIPAL SIRA IHA:

Broxura Eleisaun Antesipada 2018-2023 ne'ebé La'o Hamutuk fahe atu informa kona-ba asuntu sira relevante ho dezenvolvimentu Timor-Leste nian. La'o Hamutuk mak Institutu Timor-Leste ba Monitor no Analiza Dezenvolvimentu.

Bele hetan broxura iha edifisiu La'o Hamutuk iha Beberka ka iha ami nia facebook, website no blog @laohamutkTL
www.laohamutuk.org
http://laohamutuk.blogspot.com





Introdusaun

La'o Hamutuk mak organizasaun sosiedade sivil Timoroan, independente ida ne'ebé hala'o servisu monitorizasaun no análize ba desenvolvimentu sira iha Timor-Leste. La'o Hamutuk harii iha tinan 2000 no kontinua hala'o ninia servisu to'o oras ne'e.

Atu fasilita informasaun ba ema hotu kona-ba programa partidu polítiku sira nian iha eleisaun antisipada 2018. La'o Hamutuk husu Ita-boot sira atu tuir Kampaña Partidu Polítiku no Koligasaun nian no husu sira atu hatán ba pergunta hirak ne'ebé ami prepara ona tuir mai ne'e.

Pergunta Jerál

Saida mak ita-boot nia partidu polítiku ka koligasaun nia vizaun estratéjiku ba povu no nasaun Timor-Leste iha tinan lima oin mai?

Programa prioridade saida mak ita-boot nia partidu ka koligasaun ne'e lori hodi konvense votante sira? no tanba sá mak prioridade sira ne'e importante ba Timor-Leste iha tinan lima?

Pergunta Espesífiku

Tuirmai mak pergunta espesífiku sira kona-ba ekonomia, polítika, demokrasia no seguransa. Pergunta hirak ne'e mai hosi kontekstu atuál ne'ebé Timor-Leste iha.

Durante tinan 17 La'o Hamutuk tau matan ba asuntu importante hirak ne'e atu fahe hanoin no ajuda governu Timor-Leste hodi bele kria polítika sira ne'ebé fó benefísiu ba Timoroan hotu.



Asuntu Ekonomia

Iha tinan lima oin mai despeza estadu Timor-Leste nian maioria sei mai hosi Fundu Petrolíferu (FP) infelizmente ita nia reserva mina no gás husi kampu Bayu Undan besik hotu ona. Realidade hatudu katak iha tinan 15 nia laran kontribuisaun hosi Timor-Leste nia setór noun petrolíferu hanesan indústriia, agrikultura no turizmu ki'ik tebes no la hetan kreximentu. Aleinde ne'e Timor-Leste iha dependénsia ne'ebé aas liu ba importasaun.

Dezde tinan 2012 governu Timor-Leste iha despeza ne'ebé maka'as tebes ba desenvolvimentu infrastrutura fíziku boot sira maibé la responde ba iha nesiedade prinsipál sira hanesan be moos, sistema edukasaun, sistema saúde, empregu ba povu Timor-Leste.

Aleinde ne'e estadu Timor-Leste mós komesa foti deve, ne'ebé tuir projesaun iha tinan ualu (8) oin mai sei liu hosi biliaun ida. Deve sira ne'e ita tenke selu fila fali iha futuru.

Hirak ne'e hatudu katak Timor-Leste iha ekonomia ida ne'ebé la sustentável maske iha ambisaun atu sai nasaun ida ho rendimentu médiu alto iha tinan 2030. Saida mak ita boot nia partidu polítiku ka koligasaun sei halo iha tinan lima oin mai atu:

1. Garante sustentabilidade iha Fundu Petróleu no estabilidade finansas estadu nian?

2. Hasa'e produtividade iha setór Agrikultura, Turizmu no Indústriia Prosesamentu sira durante tinan lima oin mai

3. Hasa'e produsasaun iha rai laran hodi hamenus Timor-Leste nia dependénsia ba importasaun durante tinan lima oin mai?

4. Despeza estadu nian responde duni ba nesiedade povu Timor-Leste nian hodi hadi'ak asesu ba:

- Be mós no saneamentu**
- Edukasaun**
- Saúde**
- Kampu traballu**

5. Hamenus deve external ba estadu Timor-Leste nian?

6. Hamosu ekonomia ida ne'ebé forte no bele garante katak negociante, agrikultór no kompañia Timor-oan sira sei la sai vítima ba polítika governu atuál nian, ne'ebé hakarak lori Timor-Leste sai membru ASEAN, lori Investor sira husi rai li'ur no Organizasaun Mundial ba Negósiu, OMN (World Trade Organization, WTO)?